

Di fatti ogni pericol l'è svani,
 La carà s'è bougiasse da coul leugh,
 E l'è stait coust afè bele fini.

*J'ouma tanti coujon al di d'anchevi,
 Ch'a veulo fè mai niente, sta speranssa
 Che 'l ciel ai manda d'gran, melia e fasevi.
 Nossignor a pensa un foudre a nostra pansa.
 Agiutte ch' i t' agiuto, a l'è 'l proverbì:
 Chi sa rangiesse mei l'è coul ch' avanssa.*

FAVOLA VI.

L' Lion malavi.

Tourmentà neuit e di da frev maligna,
 Fra mes a na boscaja da fè sgiai,
 Stava l' lion stroujassà con bruta ghigna.
 Una partia immensa d' animai,
 Come servi fedei d' soa maestà,
 A stavo medicandlo ant i so guai.
 So ministr, bin sicur, l' avia mandà
 Fratant per le boscaje le pi remote
 La neuva ch' as trovava incomodà.
 J' animai d' ogni specie da soe crote
 Son fasse un ampessman d' vni a trovelo
 Per deje quaich agiut con le soe piote.
 L' ero tuti concours a medichelo,
 Fora dla volp, ch' a l' era poch d' avsin,
 Ch' andava a serchè d' erbe per purghelo.
 Per dè d' antende a l' lion d' voreije bin,
 Sour luv a fa la spia al so sovràn,
 Ch' la volp l' ha ricusà d' feje l' inchin.

La volp, ch'as na vnisia li pian pian,
 Sentend coust brut infame a caluniela,
 Subit an ment ai ven coust bel sotman.
 Ch'a scusa s'j'eu tardà per salutela.....
 (La volp a dis a l' lion) an serca andava
 D' un rimedi bastant a rissanela.....
 E bin l' asto trovalo? (l' lion criava)
 Nosgnor, ma 'l so gran mal lo guaris mi.
 E l' lion a cousta neuva as consolava.
 La volp anlora, 'l luv mostrand a di:
 Ch'a fassa splè coul sgnor (ai dis al re),
 Ch'as 'nlupa 'nt soa pel a sarà guari.
 Coust luv l' è vnuie freid da cap a pè,
 A s' è pentisse tard del pecà dla spia.....
 Bsognlo pa sul moment lassesse plè?

*Se cousta smens maligna e traditora,
 Ch' a vegeta soltant per fè del mal,
 Podeissa come 'l luv andè 'n malora,
 Saria 'n avantagi universal !!!
 Ai saria pi nen tante d' cle spie,
 Ch' a semno la zizania ant le famie.*

FINE.